

Միևնոյն ժամանակ մականներն առանց այլևայլութեան սկսում են սրով խփել ու սպանել պատահած հաւերին և սրանց ոչ մի տէրը իրեն իրաւունք չի համարում պահանջել հաւի արժէքը: Երբեմն այսպէս են վարւում նաև պատահած գառների և ուլերի հետ<sup>1)</sup>:

Բորչալիում հարսնառ գնալիս, եթէ թագուորը բարգահ կտրէքի ժամանակ որոշուած նուէրներից պակաս կամ վատ է բերել, հարսնացուի կողմի ազաւները ձեծում են թագաւորի մականներին, թէ ինչի են նորա քիչ կամ վատ բերել: Սովորաբար հարսի գիւղի ազաւների համար թագուորը նուէր է տանում թխուածքներ և հաւ, ապա թէ ոչ այդ ազաւները կը յարձակուեն թագուորի մականների վրայ և, իրենց պահանջը յայտնելով, կը ձեծեն նրանց<sup>2)</sup>:

Թշնամական այդ յարաբերութիւններն երկու կողմերի միջև աւելի ևս կենդանի են ներկայացւում՝ հարս թագցընելու սովորութեան մէջ:

Վարանդայում, երբ փեսան իւր ընկերներով գալիս է հարսնացուի տունը, «մի քանի բողբոսներ խուժում են ներս: Ղարազամի մի անկիւնում մի վարագուրով կարած է լինում, որ կոչւում է պրճախ: Այստեղ է լինում հարսնացուն իւր մի քանի ընկերուհիների հետ: Մականները գնում, նստում են վարագոյրի մօտ, իսկ քաւորը, թագուորը և փեսեղբայրը կանգնում են գորգի առաջ վառ մոմերը ձեռքին: Տան ձերունին մօտենում է թագաւորին և նուիրելով նրան մի գօտի կամ մի ուրիշ բան. խնդրում է նստել: Թագուորը, եթէ գոհ է մնում, նստում է, իսկ եթէ ոչ, կանգնած մնում»: Այնուհետև անեցիկներից ներկայ եղողները մօտենում են ու աղերսում, որ փեսան բաւականանայ ստացած ընծաներով<sup>3)</sup>:

1) Ibid. եր. 34.

2) Եր. Լալայեան՝ Բորչալուի գաւառ—Ազգագր. Հանդէս. 1902 թ. գիրք IX եր. 244—445.

3) Եր. Լալայեանի՝ Վարանդա—Ազգագր. Հանդէս. 1898 թ. գիրք. Բ.